

ISCARTA NAJ SAN PABLO YATO TET MACTA AYGACO YUL ISK'AB COMAM DIOS BEY FILIPOS

Yichebanil iscarta naj Pablo

¹ Hanin Pablo inti'an yeb juḵta Timoteo, ischejab Comam Jesucristo jehañ. Chicotz'ibrietojan hune' carta ti' teyet hex yetexxa Comam Dios yeb ayexxaco yul isk'ab Comam Jesucristo ay bey coñob Filipos, yeb tet ebnaj anciano yeb tet ebnaj diácono. ² Yak'ab Comam Dios Mame yeb xin Comam Jesucristo isc'ulch'anil isc'ul yeb xin ak'anc'ulal teyet.

Yet istxahli naj Pablo yirñ macta ayxaco yul isk'ab Comam Jesucristo

³ Hunta el chextit yul inc'ulan, caw chiwak'an yuch'andiosal tet Comam Dios teyiñ. ⁴ Yet chintxahlihan tet Comam Dios, caw chitzalacano inc'ulan ink'annihan isc'ulal isc'ul Comam teyibañ hununex. ⁵ Yuto ha' hunexpaxo chexcolwa hepujbanic'o Tzoti' yet colbanile jintajañ, yet-taxtic'a heyanico heba yul isk'ab Comam Jesucristo masanta tinañ. ⁶ Caw t'iñan wehicojan tato haca' yu yichenico Comam Dios ismunil teyiñ, hac tu' chu islahnico quexiswatx'enico yirñ isc'ulal masanto yet chihul Comam Jesucristo hunelxa.

⁷ Caw yilaltic'a innanihan haca' ti' teyiñ hes-unil, yuto caw xahan ayex wuhan, yeb xin ha' hunex chexcolwa wiñan yirñ hune' munil ak'bil

wetti'an yu Comam, hac tu' xin ha' hunex chechah isc'ulch'anil isc'ul Comam. Chexcolwa wiñan waxañca ayinictojan yul preso maca yet chinocan sata ebnaj yahawil yu incolnihan hune' tzoti' yet colbanile ti' cat walnihan ta caw yeli. ⁸ Caw yohta Comam Dios ta caw xahan ayex wuhan hesunil, hacojtam Comam Jesucristo chexxahanñeni.

⁹ Caw chink'anpaxojan tet Comam Dios yin intx-ahan tato caw ec'na xahan cheyil heba hununex yeb ta caw chiyak' Comam hehelanil yeb henabal.

¹⁰ Yuñe heyohtañen hesaynilo baytet caw c'ul, hac tu' xin caw c'ulñetic'a tzet chebeybalñe, hax-inwal machi istx'ojal chiilchalo teyin yet chihul Comam Jesucristo. ¹¹ Yeb xin sunil isc'ulal chitit yin Comam Jesucristo ayexico hebeybalñeni yuñe isbina Comam yeb yu yocpaxo ismay Comam.

Matxa weto inbahan yuto yetxa Cristo wehan

¹² Hex wuxtaj, hex wanab, chiwochehan cheyohtañeloj tato hunttek'an isya'tajil chiwilti'an chicolwa yin ispujbalaxic'o Tzoti' yet colbanile.

¹³ Caw sunil mac ay yul palacio yeb sunil anma ohtañeni ta ayinicojan preso isyayil ischejab Comam Jesucristo wehan. ¹⁴ Hayet yillaxi ta preso wehan, caw tzetc'a ebnaj juhta yihti yanma ispujbanilto Tzoti' yet colbanile. Caw matxa chixiw ebnaj yalnic'oj yuto caw yaco ebnaj Comam Dios Jahawil yipo yanma.

¹⁵ Walca xin yin caw yeli, ay mac chihalni Istzoti' Comam yu chichiwa isc'ul wiñan, cat xin ispalc'on wibañan chiyute isnani. Aypaxo xin ebnaj juhta ti' c'ul tzet nabil yu yuxinto chiyalic'oj. ¹⁶⁻¹⁷ Ay mac chihalnic'o Istzoti' Comam Jesucristo yu ay

tzet chiyochechoj, mach caw yelo isc'ul chiyalnic'oj, yuto choche yak'aco yak'bil isya'tajil wibañan yulbal ayinictijan yul preso ti'. Aypaxo mac xin chalic'o yirñ sunil yanma, caw xin yohtaj tato ayinicojan preso ti' yu incolnihan Tzoti' yet colbanile yacano Comam Jesucristo coxol.

¹⁸ Yaja' machi wocan yirñ ta c'ul nabil yu ebnaj maca mach xin, tañe chihallaxic'o Istzoti' Comam Jesucristo; wal xin caw chintzalahan yu chihallaxic'o Istzoti' Comam.

Yaj xin caw ec'balto chintzalahan, ¹⁹ yuto wohtajan tato sunil ti' chicolwa quiniscolnihan, yuto chehtxahli wiñan yeb yu iscolwal Yespíritu Comam Jesucristo wiñan. ²⁰ Yaja' ha' hune' chiwochehan yeb ayco yirñ wanmahan, tato mach chincanan yirñ tx'ixwilal, walxinto ha' intzotelan yirñ sunil wanmahan haca'tic'a yet yalañtocojoj. Waxañca itzitzinan maca chincaman chiwochehan ta chiillax isc'ulal Comam Jesucristo wiñan. ²¹ Yuto yulbal yet itzitzinan, hañc'añe ismunil Comam Cristo ayco yirñ wanmahan inwatx'enan; taca chincaman xin ec'bal caw c'ul chinelicojan. ²²⁻²³ Yuxin tato yet itzitzinan yirñ inchi behalti'an, chiyu inmunlahan ninoxa yirñ ismunil Comam Jesucristo, yuxin caw mach wohtajojan baytet wal insaynilojan xol cabeb ti'; yuto ay wala'an tato chincamnahan, cat intohan isc'atañ Comam Jesucristo, yuto ec'na c'ul hune' tu'. ²⁴ Yaja' xin, caw yilal itzitzinan hanic'oxa yul sat yibarik'in al ti' yu inmunlahan texol.

²⁵ Caw xin t'iñan wehan yirñ ti', tato chi-toquinheayojan texol yu incolwahan teyirñ hech'ibi,

yeb yuñe cam heyaben tzalahilal, yu xaheyayto yul heyanna yin Comam. ²⁶ Hayet chinapnihan tec'atañ hunelxa, cheyak' tzalaho hec'ul yin Comam Jesucristo.

²⁷ Hachcachañe chiwaltojan teyet tato cheyaco yin hec'ul hebeybalñen haca' cuybanile ayacano jet yu Comam Jesucristo. Hac tu' xin waxañca chintohan quexintucle'an maca machoj, chiwochehan wabehan hek'umal hesunil tato caw tohol heyehicoj, yeb xin tato caw hun chiyu hemunlahi, yebpaxo xin lahan helahnico hesunil heyánico heyanna yin Tzoti' yet colbanile. ²⁸ Yeb xin mach chexxiw tet ebnaj caj chexilni. Hac tu' chiyu isyenilo isba tato chic'aycanto ebnaj tu' yin hunelñe, yebpaxo xin hac tu' chu heyeniloj tato ayxa hecolbanil yu Comam Dios. ²⁹ Yuto isc'ulch'anil isc'ul Comam Jesucristo maññetaj janico janma yin, ha' wal juni, wal xin yilal jak'ni cabo coba jaben isya'tajil yinta Comam. ³⁰ Hex ti', hun lahan heyak'ni heyip helinban heba xol isya'tajil haca' inti'an. Caw xaheyila tato caw wak' wanmahan inlinban inbahan xol isya'tajil texol, tinañ xin lañan heyabeni tato hune'ñe ha' wak'ni wanmahan xol isya'tajil.

2

Jik'aweyo coba haca' yu yinayo isba Comam Jesucristo

¹ Yuxin ta chexyiptze Comam Jesucristo, ta chak' Comam yak'lobal hec'ul yu xahan ayex yu, yeb ta hunxañe heye yu Comam Espíritu Santo, yeb ta xahan cheyil heyet anmahil, cat istz'aypaxo

hec'ul yiri; ² ta hac tu', ayojab tzalahilal texol, hunlahanñeojab cheyute hexahanñen heba. Hunlahanñeojab cheyute heyanna yeb hunxañeojab tzet chiec' yiri henabal; hac tu' xin caw chititcano tzalahilal yul wanmahan heyu.

³ Mach chisje ta nime winaj cheyute heba cat helolo'ñen heba yet chewatx'en hunu tzet ye tu', wal xin chewla winaj cheyute heba. Ec'balojab yelapno ebnaj juxta teyibañ cheyabe. ⁴ Machojabñetaj isc'ulal teyiri chesayic'oj, wal xin yilal henanipaxti ebnaj juxtaj.

⁵ Lahanojab cheyute henabal haca' isnabal Comam Jesucristo.

⁶ Waxañca Dios ye Comam Jesucristo, yaj matzet yal isc'ul Comam yiri yehobal.*

⁷ Wal xin isbejcano Comam sunil tzet yet Comam yehi, yanico isba Comam chejaboj yet ispitzc'a yul sat yibañk'inal ti'.

⁸ Anma yu yulic'o Comam coxol, yinayo isba, caw xin yijem yutepaxo isba Comam masanta yiri iscamical, waxañca caw tx'ixobal hune' camical yiri te' culus tu'.

⁹ Yuxin caw ak'laxcano yip, yilaxcañ yu Comam Dios, yanico Comam hune' isbi Comam Jesucristo tu' ec'bal yelapno yibañ sunil bihe.

¹⁰ Yuxin hayet chihallax isbi Comam Jesucristo caw chiay jahno sunil mac ay yul satcañ, yeb mac ay yul sat yibañk'inal ti', yebpaxo mac ayayto yalañ tx'otx'.

* **2:6** Jn 1:1-3; Col 1:15

11 Cat xin yalni yu isti' tato ha' Comam Jesucristo, ha' caw Yahawil yecanicoj, hac tu' xin chu yoc ismay Comam Dios Mame.*

Anma ayxaco yul isk'ab Comam Jesucristo caw haca'xa issajilk'inal yehi

12 Yuxinto hex wuxtaj hex wanab, hex caw xahan ay wuti'an, yet ayinan texol caw yijem cheyute heba, hacojab tu' xin yet machijinan texol caw ec'nahojab yijem cheyute heba. Aweco yiri heyanna hexiw tet Comam cat helirban heba yiri hecolbanil. 13 Wal xin, ha' Comam chiak'ni oco yiri heyanna tzettaj isc'ulal wal heyuni, cat xin iscolwapaxo teyiri yuñe yijni isba haca' choche isc'ul.

14 Watx'ewe sunil yaj mach chexak'wi c'ule, machica xin tzet cheyalpaxoj yet chewatx'eni. 15-16 Hac tu' xin, machi mule yeb istx'ojal chilchalo teyiri yu anma, walxinto caw yuninal Comam Dios cheyute heba. Ec'añwe yiri isc'ulal xol anma machiswalil yeb caw tx'ojcanoj. Wal xin caw chextzejla xol anma haca' istzejla tx'umel xol k'ejholo, yuto hex cheyalic'o Istzoti' Comam Dios chiak'ni k'inale tet anma. Hac tu' xin yet chul Comam Jesucristo caw chiwabehan tzalahilal teyiri, yuto caw wohtajan tato mach nabñeho quinec'an texol, yeb xin mach nabñeho quinmunlahan texol.

17 Waxañca xin caw chiwaco innimanilti'an xahanbalil, yuñe istz'ajnacano xahanbal cheyak' tet Comam Dios yu heyanna yiri Comam, caw chintzalahan cat inpohniltojan hune' tzalahilal ti'

* 2:11 Is 45:23

texol. ¹⁸ Tzalahañwepaxo hex ti', ak'we tzalaho hec'ul yirñ hune' bay chintzalacoti'an.

Yal naj Pablo ta chato naj naj Timoteo yeb naj Epafrodito ilwal yirñ ebnaj juxtaj

¹⁹ Tato caw chi'el yirñ isc'ul Comam Jesucristo Jahawil chito naj Timoteo quexistucle' yet hecal cabe ti' haca' chiwochehan, yurñe yilni naj hanic' heyehicoj cat yiniti naj tzoti' wetan. Hac tu' chu istzalacañ inc'ulan yet chiwabehan hanic' heyehi.

²⁰ Yuto hañc'añe naj Timoteo ti', lahan istxumni haca' inti'an, yeb xin chaco yirñ isc'ul iswatx'en isc'ulal teyirñ. ²¹ Yaj wal huntেক'anxa ebnaj xin, ha' tzet choche isc'ul ebnaj chissaya, mařtaj tzet choche Comam Jesucristo. ²² Walex hex ti', hey-

ohtaxa hanta isc'ulal chiyute isba naj Timoteo ti', yeb xin ta caw chicolwapaxo naj wintajan yirñ jalnic'ojañ Istzoti' Comam Jesucristo. Haca' iscolwa hunu naj c'ahole yirñ ismam, hac tu' iscolwa naj wirñan. ²³ Yuxin toxañe chiwechmahan tzet chinelicojan yirñ hune' isya'tajil ayayo wibañti'an, cat wanitojan naj quexistuclenoj. ²⁴ Yaj xin chicawxi inc'ulan yirñ Comam Dios tato chintopaxo-

jan quexwila'an yirñ lembil.

²⁵ Chiec'paxo yirñ innabalan tato caw yilal wanipaxtojan naj Epafrodito quexyila'. Naj juřta ti', caw chicolwa naj wintajan yirñ ismunil Comam Jesucristo, yeb ha' hun naj chiak'len isya'tajil wintajan. Naj juřta ti', hex heyati naj colwal wirñan.

²⁶ Wal xin caw choche naj isto quexyila' hesunil, caw xin ayco yirñ isc'ul naj teyirñ yuto heyabeloj tato ya'biay naj. ²⁷ Wal tu', caw yeli ay hune' yabil oc yirñ naj, hanic'xañe mach cam naj yu. Yaj xin

caw ok' isc'ul Comam Dios yirñ naj iscawxicañ naj. Yaj caw maññetaj yirñ naj ok' yanma Comam, caw tz'aypaxo isc'ul Comam wiñan, yuñe matxa cam chislahico bisc'ulal wiñan yu naj.

²⁸ Yuxin matxa chiec'ayo yet inchejnitojan naj tec'atañ, haxinwal chextzalacañ yet cheyilni yapni naj hunelxa. Yu hetzalahilal yirñ naj chipax hanic' inbisc'ulalan. ²⁹ Chahwe naj yirñ tzalahilal yuto caw heyuxta naj yirñ Comam Jesucristo. Caw xahanojab cheyil mac haca' naj ti'. ³⁰ Yuto yu ismunil Comam Jesucristo, yuxin etza cam naj. Caw ishin isba naj iscam wiñan heseleloj, yuto caw nahat ayexilo wiñan.

3

Ha' tzet caw ec'bal yelapno yehi

¹ Wal tinañ hex wuxtaj, hex wanab, tzalahañwe yirñ Comam Jesucristo Jahawil. Haninti'an, mach tx'ojo chiwabehan intz'ibñientojan tzettaj ye tu' xa-tic'a-intz'ibñietojan teyet, wal xin caw ch'ocnico heyu.

² Caw nanñe heyu tet ebnaj caw lahlonñetic'a yec' haca' metx tx'i', hañic'añetic'a ismachiswalilal chiswatx'e, cat yalni ta caw yilal chioc hune' circuncisión yirñ conimanil. ³ Hañioñ ti', yirñ caw yeli circuncidadoxa je yul sat Comam Dios, yuto chijiyo coba tet Comam Dios yu yip Comam Espíritu Santo. Choñtzalahi yuto yetxa Comam Jesucristo jehi, mañtaj yirñej yechel choc yirñ conimanil bay chicawxi coc'ul.

⁴ Haninti'an wal wanico wanmahan yirñ hunttek'an chileyal ebnaj tu', yuto caw tz'ajan inwatx'ehan sunil tzet chal isley naj Moisés.

⁵ Yuto waxajebixto tz'ayic inpitzc'ahan wak'lax circuncidaran. Caw Israel wichmaman, yir̄ yuninal naj Benjamín titnajinan, Hebreo inan, caw Hebreo inmaman yeb inmi'an, fariseo inpaxojan yir̄ walnic'ojan cuybanile yir̄ isley naj Moisés. ⁶ Caw ayco wanmahan yir̄ cuybanile tu', yuxin quinocan incaja'an macta ayxaco yul isk'ab Comam Jesucristo, caw xin inyijenan ley tu', caw machi hunu mac chu yalni ta mach tz'ajano yu inyijenan.

⁷ Yaja' sunil huntেক'an aycano yelapno ye yul insatan yet yalañtocado tu', tinañ matxa tzet chalilo yul insatan, yaj yu Comam Jesucristo. ⁸ Yir̄ caw isyelal, sunil huntেক'an tu', caw matzet chiocnico wuhan tinañ; ha' hune' caw aycano yelapno yehi, ha' yir̄ caw wohtañenilojan Comam Jesucristo Jahawil. Sunil huntেক'an bejbilcano wutu'an xin caw haca'xa k'alem ye yul insatan, yu inchah-nihan hune' inmajulan yinta Comam Jesucristo, ⁹ hac tu' xin hunxañe chiwucanojan yeb Comam. Tinañ xin, c'ulinan yul sat Comam Dios, yuto waco wanmahan yir̄ Comam Jesucristo, mach yuho inyijenan tzet chal isley naj Moisés. Cachanñe yu janico janma yir̄ Comam Jesucristo choñoc c'ulal yul sat Comam Dios. ¹⁰ Hac tu' xin chiwohtañehan Comam Jesucristo, cat wabenan yip Comam Dios yir̄ wanmahan, hune' yip Comam pitzc'ancañ Comam Jesucristo xol camom. Yeb yu wak'lenan isya'tajil haca' yak'le Comam, yeb incaman haca' yu iscam Comam. ¹¹ Chicawxipaxo inc'ulal ta chinitzitzbicar̄an xol camom.

Yet chijinati janma japni yir̄ hune' bay nabilto ju

¹² Caw mach lañano walnihan tato caw xatzujcha sunil huntেক'an ti' wuhan maca caw tohol inxahan, wal xin caw lahbilico wuhan intohan insatajan. Ayco yiriñ wanmahan intzujnayojan huntেক'an nabil wiñan yu Comam Jesucristo yet quiniştzujnayojan babel. ¹³ Hex wuxtaj, hex wanab, mach lañano walnihan tato xatzujcha apno huntেক'an tu' wuhan, yaja' ha' hune' chiwutehan tinañ caw matxa chinнатijan huntেক'an inwatx'ehan yet yalañitocanoj; chiwak'ni wanmahan intzujnayojan huntেক'an ayco insatajan. ¹⁴ Hac tu' xin chu istzujcha apno wuhan, cat yak'lax hune' matan wetan, hune' bay awtebiloñ yu Comam Dios, yuto hunxa je yeb Comam Jesucristo.

¹⁵ Yuxin suniloñ ayxa yip janma yiriñ Comam, yilal cotxumni haca' tu', yaja' ta ay hunujex nan chu hetxumniloj, ha' Comam Dios chiyenopaxilo teyet. ¹⁶ Yaja' ha' hune' caw yilal, ec'ojoñwe yiriñ huntেক'an tzet xatzujcha apno ju.

¹⁷ Hex wuxtaj, hex wanab, ilweto hewatx'en haca' inbeybalan yeb isbeybal macta chibelwi haca'tic'a yu coyenicanoljañ teyet. ¹⁸ Ay hune' tzet ti' tx'i'al elxa chiwalan teyet. Tinañ xin caw chinok'an chiwalnipaxtojan teyet tato caw tzetc'a ebnaj ayco ishowal yiriñ cuybanile yiriñ iscamical Comam Jesucristo yiriñ te' culus. ¹⁹ Huntেক'an ebnaj tu' xin yilal yaben isya'tajil, cat istañtzelaşcaniloj, yuto hañc'añe istx'ojal choche isc'ul iswatx'e', ha' ton xin caw aycanico isdiosalo ebnaj. Caw xin chitzala ebnaj iswatx'en tzettaj caw tx'ixobal; caw xin hañc'añe tzettaj ye tu' ay yul sat yibañk'inal ti' ayco yiriñ isnabal. ²⁰ Wal

hañoñ ti' xin yetxa satcañ jehi. Lañan jechman yayilo Cocolomal yul satcañ, ha' ton Comam Jesucristo Jahawil. ²¹ Ha' Comam chihelni hune' conimanil machi yip ti', haca' xin isc'ulch'anil isnimanil hac tu' choñelicoj. Yu ishelanil Comam yuxin chishel conimanil, ha' ton hune' ishelanil tu' chimunla yibañ sunil tzet ay yul sat yibañk'inal ti'.

4

Tzalahañwe yirñ Comam Jesucristo Jahawil

¹ Yuxin hex wuxtaj hex wanab, caw xahan ayex wuhan. Caw ay wala'an chiwilicojan teyirñ tinañ, caw istzalabal wanmahan heyehi, yeb xin ispajpaxo inmunilan heyehi. Caw chelahweco xin, toholojab cheyute hebeybal yirñ Comam Jesucristo.

² Chiwaltojan tet janab Evodia yeb xin janab Síntique tato caw yilal yoc ebix yirñ ak'anc'ulal, yuto caw isnohxa isba ebix yirñ Comam Jesucristo.

³ Yebpaxo xin, hach wuxta wet munlawomal caw yijem, chink'anan tawet chaçcolwa yirñ ebix janab ti', haxinwal chioc ebix yirñ ak'anc'ulal, yuto caw colwa ebix wiñan yalnic'o Tzoti' c'ul yet colbanile xol anma; yebpaxo juxta Clemente caw colwa wintajan, yeb hunték'anxa ebnaj juxtaj. Ebnaj tu' tz'ibñebilxayo isbi ebnaj yul te' hum bay ayayo isbi macta ayxa isk'inal mach istañbal yirñ Comam Jesucristo.

⁴ Tzalahañwe yirñ Comam Jesucristo Jahawil sunilbal tiempo. Chiwalnipayojan hunelxa, ¡tzalahañwej! ⁵ Caw c'ulch'anojab hec'ul yul sat sunil anma. Hanic'xañe tiempohal cat yul Comam.

⁶ Machojab tzet caw cheyaco yiñ hec'ul. Halwe sunil tzet cheyoche tet Comam Dios yiñ hetxah, k'anwe tet Comam cat xin heyak'nipaxo yuch'andiosal tet Comam. ⁷ Hac tu' xin chiyu yak'ni Comam Dios ak'anc'ulal teyet. Hune' ak'anc'ulal tu', caw ec'bal sata hanta tzet chiyu istxumchalo yu anma. Hune' ak'anc'ulal tu', ha' chic'uban heyanna yeb xin tzet chiec' yiñ hena-bal, yuto caw hunxa heye yeb Comam Jesucristo.

Aweco henabal yiñ tzettaj caw c'ul

⁸ Tinañ xin, hex wuxtaj hex wanab, aweco henabal yiñ sunil tzet caw t'iñan yehi, yiñ sunil tzet ay yelapno yul cosat, yiñ sunil tzet caw tohol, yiñ tzet mach isquistalil, yeb yiñ sunil tzet caw yeli, yeb yiñ sunil tzet chijoche jabe', yebpaxo yiñ sunil tzet caw c'ul yul sat Comam Dios, yeb huntex'an caw istzan yallax c'ulla tzoti' yiñ; ha' yiñ huntex'an tu' cheyaco henabal. ⁹ Yijewe huntex'an cuybanile yeb chejbanile wak'an teyet, yeb huntex'an tzet heyabe walnihan, yeb tzet heyil inwatx'enan. Ta chewatx'e haca' tu', chioç Comam Dios heyetbihoj, chiyak'nipaxo Comam ak'anc'ulal teyet.

Huntek'an colwal yato ebnaj juxta tet naj Pablo

¹⁰ Wal tinañ xin, caw chintzalahan yiñ Comam Jesucristo Jahawil, yuto quinhenatijan heyantiti hecolwal wetan. Mach lañano walnihan ta xaquinhenahulñetojan, ¡machoj! Wal xin ayinñetic'acojan yiñ henabal, yaj toñe ton yumi machi yu hecolwa wiñan. ¹¹ Wal xin, mañtaj yu caw matzet ayinan yuxin chiwaltojan hune' ti' teyet, machoj; wal xin k'aynajinxahan wak'ni tzalaho wanmahan yiñ tzet ay yul ink'aban.

¹² Wohtajan wijlenan isya'tajil, ay tiempo machi nich'ano tzet ayinan. Aypaxo tiempo caw c'ul chiec' wila'an, wohtajan wijlenan wahil, aypaxo tiempo nohnarietic'a inc'ulan, aypaxo tiempo ay inmelyuhan yeb ay tiempo machipaxo inmelyuhan, yaja' k'aynajinxatic'ahan yiñ sunil.

¹³ Sunil chisje wuhan, yuto ha' Comam Jesucristo chicolwa wiñan. ¹⁴ Yaja' hex ti', caw c'ul tzet chewatx'e yuto xaheyati hecolwal wetan yet ayinicojan yiñ hune' isya'tajil ti'.

¹⁵ Yet welan yul ismajul Macedonia, yet wichenicojan walnic'ojan Tzoti' c'ul yet colbanile yul huntেক'anxa nan coñobal, hañc'añe hex ay yul isk'ab Comam bey yul coñob Filipos quexcolwa wiñan. Ha' ton tu' heyak' ispajo wetan, yuto hechah colbanile yu inmunilan texol. Wal hunmajanxa ebnaj ayxaco yul isk'ab Comam yul huntেক'anxa coñob bey tu', matzet yak'a.

¹⁶ Yebpaxo yet ayinan bey coñob Tesalónica, cayel oxel heyato hecolwabal wetan, yu yoc yiñ tzet chiocnico wuhan. ¹⁷ Maññetaj inchahnihan hecolwabal ayco yiñ innabalan, wal xin caw chintzalahan yuto ec'balto chiak'lax ispaj selet teyet yu Comam Dios.

¹⁸ Yuxin caw nimanxa tzet chinchahan teyet, caw xapalc'oni. Sunil tzet heyati wetan yinta naj Epafrodito, c'uxanxa. Caw c'ul hune' tu' yul sat Comam Dios, yuto haca' isxuk'al sam hunu xahanbal chijak' tet Comam, hac tu' issak'alil hune' hecolwabal tu'. ¹⁹ Ha' Comam Dios xin chiak'ni sunil tzet matzet yul hek'ab, haca'tic'a isc'ulch'anil isk'alomal ay yiñ Comam Jesucristo.

²⁰ Ayojab yelapno isbi Comam Dios Mame yiñ

sunilbal tiempo. Ha' ton Comam, Mame jiñ co-sunil. ¡Hacojab tu'!

Yalto naj Pablo ta chil isba macta ayxaco yul isk'ab Comam

²¹ Chiwaltojan teyet cheyil heba yiñ hecawil hesunil yetexxa Comam Dios bey tu', hex hunxañe heye yiñ Comam Jesucristo. Chalpaxto ebnaj juxtaj ay inc'atañan ta cheyil heba yiñ hecawil.

²² Chalpaxto sunil mac yetxa Comam bey ti' ta cheyil heba yiñ hecawil, yebpaxo xin ebnaj juxta chimunla yinta naj yahaw Roma ti'.

²³ Yak'abayo Comam Jesucristo isc'ulch'anil isc'ul teyibañ hesunil.

Nuevo Testamento yin abxubal
New Testament in Jakalteko Eastern; jac
(GT:jac:Jakalteko)

copyright © 1997 Wycliffe Bible Translators, Inc.

Language: Jakalteko

Translation by: Wycliffe Bible Translators, Inc.

Copyright Information

© 1997, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Jakalteko

© 1997, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files
dated 29 Jan 2022

b5bce385-9ed7-5701-9edc-e221ef239a1c